

COLOSENSES

Colosensesdih jwí túi beh joyát pínah naáwát

¿Déhe tiguaá daánciji? Pablo, Dios á jib bohéat túetni nin núodih át daacáp wut jī. Pablo ded pah á jumtndih chah jéihfhna, Romanosdih jwí túi beh joyát pínah naáwátndih ñi enee.

¿Detndih át daáncji? Colosas tútchndih moón Jesúfhwádh Pablo nin núodih át daac wahap wut jī. Colosas tútchi Asia baácboó jumni, buúh buúgní tútchi át jumap wut jī. Pablojeh queétdih Jesúfh doonádh át bohécap wut jī. Bífh Jesúfhboó, Épafra wut jumni, queétdih á naáwáchah, ít jepahap wut jī. Pablo Éfeso tútchiboó tres jópchi á bohénachah, Épafra Jesúsndih át jepahap wut jī. Pánihna, Pablo á bohéniji át jumap wut jī. (1.7-8; Hch 19.10)

¿Dedmant, débólih cah, át daáncji? Chah jéihnít “Pablo Roma tútchi nemat muúboó jumnit, jópchi 60 (Jesús á wunat túttimah 27 jópchi túttimah) nin núodih át daac wahap wut jī”, í níj jenah joiná caá.

¿Dedé pínah tiguaá át daáncji? Épafra queétdih Jesúfh doonádh á naáwát túttimah, bitaboó í pebhna juibínit, queétdih ít yee bohénap wut jī. Pánihna, Épafra Pablo pebhboó juibínit, caandh á naáwáchah, í yee bohéatndih yoobáát túet níjná, Pabloboó queétdih nin núodih át daac wahap wut jī.

Colosenses ded pah á jumt:

1. Pablo á daac jwífhah (1.1-14)
 - a. Queétdih á túyat tútat (1.1-2)
 - b. Diosndih “Túini caá”, níjnít, queétdih á uúbát (1.3-14)
2. Jesucristo chah á jumt (1.15-23)
3. Pablo Jesúfhwádh ded pah búdí á teo wúhat (1.24—2.7)
4. Jesús bícdih jumnit, cáacwájuh í wutatndih jepahcat caá náahap (2.8-23)
5. Jesúfhwá caandh jepahnit, ded pah jwí túi chájat (3.1—4.6)
6. Pablo á péé túyat tútat (4.7-18)

Pablo queétdih á túyat tútat

1¹⁻²Weém, Pablo, jwí úud panihni Timoteojh yeebdh túyat tútma, bífhndih daacát túetni, nin núodih wá wahna caá. Jesúfh túini doonádh naóhni pínah níjná, Dios weemdh á nífwip jī. Yeéb Colosas tútchndih moón Jesúsndih cádahcannitndih wá daac wahna caá. Jwí íp Dios yeebdh oinit, á teo wáaca naáh, ñi túi jumt pínah níjná.

Pablo Jesúfhwádh á uúbát

³⁻⁴Yeéb Jesucristodih túi jenah joinít, bita áihwádhbut ñi túi oina caá. Caán doonádh joiná, weínit, Dios, jwí Maáh Jesucristo ípdih yeebdh uúbhna,

“Queétdih ma teo wáacat túina caá, Paá”, jwípjí níjná caá. ⁵Yoobópdih jumni naáwát Jesúfh túini doonádh jwífh joinít, páantjeh jeáboó ájeéh yeebdh á jumt tútat pínahndih ñit joyóp taga. Páant á chájat pínahndih túi páina, Jesúsndih túi jenah joinít, bita áihwádhbut ñi túi oina caá. ⁶Caán túini doonádh yeéb Colosandih moón ñi jwífh jóí láa, “Dios jwiítndih búdí oinit, á túi teo wáacna caá. Páant á teo wáacat pínah dooná yoobópdih tiguaá”, ñit níj jéihyep taga. Pánih jéihnít, túi túet nuumná caá ñi chájav. Bíc yoobó chah dawá tútchinadh moonbút caán túini doonádh joinít, túet nuum béjna caá í chájav. ⁷Épafra yeebdh caán túini doonádh át jwífh bohénap wut

jí. * Caán búdí jwí oini, weem páh Cristoíh doonádih naóh cádahcanni ā jumna caá. Pánih bohénit, yeebdíh át túi teo wáacac taga, ñi túut nuumát pínah niijná. ⁸Pánihna, jwí pebhna jwinít, ñi túi túut nuumátidih Épafra jwiítidih ā niij naawáp be. “Túini Espíritu ā teo wáacatjìh Diosdih, nihat Jesúfhwádihbut queét í túi oina caá”, ā niijíp be.

⁹Páant ñi túi chājat doonádih joinít, yeó jāap jummat pah yeebdíh jwípí úbh cádahcan caá. “Ded pah yoobópdih bohéat, yoobópdih nihcannidihbut Túini Espíritu ā teo wáacatjìh queétdih ma túi jéihyanaá, ded pah queétdih ma náah yacatdih í jéihyat pínah niijná”, jwípí niij úbhna caá. ¹⁰Dios yeebdíh ā teo wáacac pínahdih jwípí úbhna caá, áihwā jumna, jwí Maáhdih chah jéihnít, ā náahat pah ñi túi chājat pínah niijná. ¹¹Nin pahbut yeebdíh jwípí niij úbhna caá: “Paá, búdí ma wēpatjìh queétdih ma teo wáacá, bita queétdih yeejép í chājachah yuhna, oi cádahcan, bíic yoobó wēnít, í túi jummat pínah niijná. ¹²Meém queétdih míihwā pínah mat chājav taga. Pánih chājna, ma pebh yeh iiguípna í juibínachah, nihat míihwā í bíbohah pínahdih queétdihbut ma wūbhípa caá. Pánihna, nihat ma teo wáacatdih jéihnít, meemdíh ‘Búdí túina caá, Paá’, í niijí naáh”, jwípí niij úbhna caá.

Ded pah jwiítidih Jesús ā teo wáacac

¹³⁻¹⁴Diosjeh jwiít iiguípna bejnít déejidih át túi ubup wut jí. Játih nemépwā í maáh jwiítidih ā wutuchah, dupúat paníhipboó jumnit, yeejatdih jwí jéih cádahcap jí. Obohjeéhtih, yeejnit jwí jumuchah yuhna, Diosboó ā wūúh, ā oinidih át wun wūhat túutup wut jí, jwí yeejatdih ā yohat pínah niijná. Pánih chājna, jwiítidih dupúat paníhipmant ub bacanit, ā wūúh, ā oini ā maáh jumupna át waadát túutup wut jí.*

¹⁵Cristo ā íp Diosdih bíic yoobó ā jumna caá. Pánihna, nin baácdih í chājav

pínah játih jumna, nihat í chājavtidih maáh ā jumna caá. Obohjeéhtih, jwiít cáacwā Diosdih jwí jéih encah yuhna, ā wūúhboó ā íp ded pah ā jummatdih jwiítidih ā jéihyana caá. ¹⁶Dios ā wutuchah, Cristo nihat buu jumni pínahdih át jgohanap wut jí. Jeáboó jumnitdih, nin baácboó jumnitdih, jwí ennidih, jwí enca naáhdihbut át chājav wut jí. Nihat ángelwádih, nin baácdih moón, nihat í maátadihbut át chājav wut jí. Pánihna, Cristo ā wut chah yáaat pínah niijná, nihatdih át chājav túutup wut jí.* ¹⁷Cristojeh, nihatdih í chājav pínah játih jumna, waóhni ā jumna caá. Á wēpatjìh nihatdih páantjeh ā túi jummat túutna caá.* ¹⁸Nihat jwiít áihwā áih bácah paníhni jwí jumuchah, caánboó jwíih wao dáh paníhni ā jumna caá. Caán wunni, jwíih waóh boó pud jūóhni, nihatdih maáh yoobát ā jumna caá.* ¹⁹Cristo jwí íp bíicdih bíic bácah paníhni jumna, nihat Dios ā wēpat Cristodihbut ā jumna caá. Páant ā jummatdih jwí íp át náah yacac wut jí. ²⁰Nihat cáacwā jwí ípdih eníhcan, jwít yeej chājav wut jí. Páant eníhcannit jwí jumuchah, jwí íp Cristodih cruzboó át wun wūhat túutup wut jí, áih meépjìh nihat cáacwā jwí yeejat júb buadátidih ā júb chājav pínah, ájeéh jwí túi jummat pínahbut niijná. Pánih chājnit, nihat jeáboó jumnit, nihat nin baácboó jumnitdihbut caán bíicdih át túi jummat túutup wut jí.*

Cristo jwiítidih ā túi ubuchah, ded pah jwí jummat

²¹Yeebút bíic yoobó Diosdih eníhcannit, yeejnit jumna, caán bíicdih ñit jéih jumcap jí. ²²Obohjeéhtih, caandíh ñi eníhcatdih cádahat túutnit, buu ájeéh bíicdih Dios át jwúub jummat túutup wut jí. Cristo ā wun wūhatjìh páant át chājav wut jí. Pánih chājna, ā pehbboó yeebdíh jummat túutnit, “Queét yeejat wihcah, peéh chājav queétdih ā wihcannit”, ā niijbípna caá. ²³Jesúfh doonádih túi jenah joinít, behnit paníhni jumna, “Á niijátji pah, ā pehbboó wā juibínachah,

* 1.7 Col 4.12; Flm 23 * 1.13-14 Ef 1.7; 6.12 * 1.16 Ef 6.12 * 1.15-17 Jn 1.1-3,18; He 1.2-3 * 1.18 Hch 26.23; Ef 1.22-23; 4.15; Ap 1.5 * 1.20 Ef 2.16

Dios weemdih táinidih ā wāhbiḡna caá”, ñi níj jengah jói cádahcah, páant yeebdih ā wāhbiḡna caá. Caán táini doonádih nihát tātchinadih moón it joyóḡ wut yah jí. Weém Pablobut caán doonádihjeh tigaá wāpí naáwáp.

Jesúshwádih Pablo ā teo wáacat

²⁴Jwí yéejatdih yohat túut niijná, Cristo búdí át yéej chūúḡp wut jí. Biíc yoobó weembú yeebdih teo wáacat túut niijná, wā yéej chūúhna yuhna, búdí wā wéina caá. Jwiít nihát Cristodih teo wāhniit jumna, biíc yoobó jwí yéej chūúhbiḡna caá. Cristofih táini doonádih bohéát túut niijná, yeejép ā yapat pínah weemdih páantjeh ā judh jwuhna caá. Pánihna, yeéb áihwā, áih bácah panihni ñi jumuchah, yeebdih teo wáacat túut niijná, weemdih yeejép ā yapachah yuhna, búdí wā wéina caá. ²⁵Jesúshwádih teo wāhni wā jumát pínah niijná, Dios weemdih ā níwip jí. Páant ā níwatdih jéihna, nihát yeéb wā déewā nihcannitdih wā túi naóh bohé jibna caá. Yeebbút buudcánnit ñi jumát pínah doonádih ñi túi jéihyat pínah niijná, Dios weemdih páant ā naóh jibat túutap jí.*

²⁶Caán doonádih jon játih Dios cáacwádih át naáwát túut jwuhcap wut jí. Obohjehtih, buú áihwádih át túi naóh beedáat túutap be, buca. ²⁷Caán doonádih í jéih jwuhcah yuhna, “Judíowā nihcannitdihbut búdí wā túi chājbiḡna caá”, níj jengah joinít, buú áih cáacwádih caandih át jéihya naáwáp taga. Nin pah caá ā jéihya naáwát: Cristo yeéb áihwájéeh ā jumuchah, jeáboó chah týyupna ñi juibsiḡna caá. Caán doonádih jéihniit, yeéb wā déewā nihcannitbut ñi túi wéi páina caá.

²⁸Caán Cristofih doonádihjeh tigaá nihatdih jwí bohénap. Pánih bohéna, “Yeó jáap jumát pah Cristodih túi péenit, caandih ñi cádahca bojoó”, queétdih jwípi níj naóhna caá. Dios pebhna juibínit, “Nit ma wūúhdih jepahnit, caandih túi péenitji caá”, Diosdih jwí níj naáwát túut niijná, ā jéihyaatjih queétdih jwí túi bohéna caá. ²⁹Pánihna, chūúná

yuhna, Dios weemdih búdí ā teo wáacatjih wāpí teo cádahca caá.

2 ¹Yeéb Colosas tātchidih moóni, Laodicea tātchidih moóni pínahdihbut búdí wā teona caá. Nihat bita weemdih jéih jwuhcannitfih pínahdihbut búdí wā teona caá. Páant wā tewatdih ñi jéihyatdih yeebdih wā náah yacna caá. ²Nin panihat pínahdih wā teona caá: Wéinit, míic oinit, túi bícdih ñi jumát pínah, “Dios jwiítidih búdí ā túi chājbiḡna caá”, ñi níj jéihyat pínahdih wā náah yacna caá. Dios jon játih ā jéihya jwuhca naáhjidih ñi túi jéihyat pínahdihbut wā náah yacna caá. Caán ā jéihya jwuh canaáhji nin pah caá: Yeéb judíowā nihcannitbut Cristodih jepahnit, Diosjeéh ñi túi jumbiḡna caá. ³Caán Cristo nihatdih ā jéih beedána caá. Pánih jéihni ā jumuchah, ā teo wáacatjihjeh túi jengah joinít yeéb ñi jumbiḡna caá. ⁴Pánih túi jengah joinít jumna, bita yeebdih túi naóhniit pah í níj yeenachah yuhna, queétdih ñi joyáh bojbiḡna caá. ⁵Weém ñijéeh wiłcan yuhna, ñijéeh jumni pah wā jengah joiná caá. Pánihna, Cristodih túi péenit, túi bícdih ñi jumát doonádih joinít, búdí wā wéina caá.

Jwiít Cristofhwádih ā túut nuumát túutat

⁶⁻⁷Épafra Cristofih táini doonádih yeebdih ā jwíh bohénachah, túi jepahnit, “Wā Maáh ma jumúú”, Cristodih ñit níj naáwáp wut jí. Ñi jwíh jepahatji biíc yoobó páantjeh yeó jáap jumát pah caandih ñi túi péena. Pánih péenit, yeó jáap jumát pah caandih chah jengah joiná, caandih wéinit, “Búdí ma teo wáacat túina caá, Paá”, Diosdih niijnít ñi jumúú.

⁸Ñi túi chāja chaáh! Cáacwā í yee bohéatdih ñi joyáh bojoó. Queét jon játih moón í jengah joyátidihjeh í bohéna caá. Páant í bohéát dedé pínah nihcan caá. Diosdih jéihcannitboó í wutadidihjeh í bohéna caá. Cristofihoodih í bohécan caá.*

⁹Nin pah Cristofih dooná ā jumna caá: Caán jwí íip biíc yoobó jumni, Diosjeh tigaá ā jumup. Páant ā jumuchah yuhna,

* 1.25 Ef 3.2 * 2.1 Ap 3.14-22 * 2.8 Gá 4.3,9

nin baáčboó jwí nihát pah át cáac jumup wut jī. Cáac yoobát ā jumuchah yuhna, ā ĩp ā wēpat, ā oyat, ā táyatbut caandíh ā jumna caá. ¹⁰Yeéb Cristofhwā jumna, Dios ā wēpat, ā oyat, ā táyatbut yeebđíhbut ā jumna caá. Pánihna, níh caolihdíh dedé ā judhcan caá. Caán Cristo nihát maátadíh chah maáh ā jumna caá. ¹¹Wā déewā Dios ā wutatjídih jepahat tút niijná, quehli nah yapat chóodih ĩpí bóod yohna caá. Obohjeéhtih, yeebboó páant ní chājcah yuhna, Cristofhwā jumna, bóod yohnit panihnit tigaá ní jumup. ĩ bóod yohat pah ní yéej chājíhat jenah joyátđih Cristoboó yeebđíh át yohop taga. ¹²Caandíh ní jepahachah, daabánit níit jumup taga. Pánih daabánit, jwúb pah jüóhna, Jesúsdih ĩ yohat, ā jwúb boo pud jüwát pah ā jumna caá. Páant ā chājat dée pah chājnit, ājeéh bícdih ní jumna caá. Pánihna, “Dios ā wēpatjīh Cristodih ā boonachah, weemđíhbut ā wēpatjīh táiniboodíh ā tút nūmbírna caá”, níit níj jenah joyóp taga.*

¹³Yeéb játih wūnnit panihnit jumna, ní yéejat jíib iiguírna bejnit pínah níit jum jwuhup taga. Obohjeéhtih, būu Cristo ā wūn wūhatjīh jwí ĩp yeebđíh ājeéh jumnit pínah át chājav taga. Jwiít nihát jwí yéejatđih át yohop taga.* ¹⁴Moisés ā wutatjídih jwí jepahcah, jwiítđih peéh chājav át jumup wut jī. Obohjeéhtih, Cristo cruzboó nūhnit, jwiítđih ā wūn wūhatjīh caán wutatjídih jwí jepahcat jíib būudáátđih Dios át yohop wut jī.* ¹⁵Cristo pánih wūna, nemépwā ĩ naóh yacat wēpatđih dúuc wáinít, át yohop wut jī. Pánih yohnit, nemépwā ĩ maáh bícdih Dios ā yap yohochah, oboh jumnit ĩ jumna caá. Cristo cruzboó ā wūnatjīh queéđih ā yap yohatđih nihátđih jéihyana, Dios queéđih át tíicanap wut jī.

**Cristofhwā jumna, jwí nuowā
ĩ wutatjídih jwí jepahcat**

¹⁶Ní jeémátđih, ní babhbatđihbut enna, jǒpchí jumat pah, widh jumat pah,

semana jumat pah, “Būu Diosdih chah jwí weñat pínah yeó jáapna caá”, níj jenah joicán, ní míic wáaccab enna, “Queéđih peéh chājav caá náahap”, bita yeebđíh ĩta níj en tagaá. Páant ĩ níjíchah joiná yuhna, páantjeh queéđih ní joyáh bojóo.* ¹⁷Dios jon játih moondíh páant ĩ chājav pínahđih át wutjip taga, túttimah ded pah Cristo ā wūn wūhat pínahđih jwiítđih jéihyaat tút niijná. Obohjeéhtih, būu láa Cristo jwiítđih wūn wūhnit, ā jwúb boo pud jüwátđih jwí túi jéihna caá. ¹⁸Bitaboó nin pah ĩpí chājna caá: “Weém oboh jumni Diosdih wā jéih wúbhcan caá”, níj jenah joinít, ángelwáđih ĩpí wúbhna caá, ĩ wúbátđih queéđ Diosdih ĩ jwúb naóh yapaat pínah niijná. Bitabut “Oo júmat pah jíghatđih wā enep be. Pánih ennit, weém chah jéihni caá”, ĩpí níj jenah joiná yuh caá. Obohjeéhtih, páant ĩ níj jenah joyát dedé pínah nihcan caá. Pánih jumnit, “Ded pah jwí chājav bíic yoobó, yeéb ní chājavat jíib, yeebđíh Dios ā peéh chāja naáh”, yeebđíh ĩ níjíchah yuhna, queéđih ní joyáh bojóo. ¹⁹Páant niijnítboó Cristo ā wutat pah chājav, ājeéh ĩ jumcan caá. Obohjeéhtih, jwiítboó áihwā ājeéh jumnit, áih bácah panihni jwí jumna caá. Caánboó wao dáh panihni jumna, jwiítđih ā watna caá. Caandíh jwí jepahachah, Diosboó jwiítđih ápí teo wáacna caá, caandíh chah jwí jéihyat pínah niijná.*

²⁰Cristo yeebđíh át wūn wūhup taga, yéej chāj cádahnit, táiniboodíh ní tút nūmát pínah niijná. Pánih tút nūmná, Diosdih jepahcannitboó ĩ wutuchah, ní joyáh bojóo.* ²¹Queéđ ĩ jenah joyátjīh nin pah yeebđíh ĩpí níj watna caá: “Caán jeémátđih babhbatđihbut jeémpan, babhcan, ní teoca bojóo”, ĩpí níj watna caá. ²²Obohjeéhtih dedéđih jwí jeémécah, waicanjeh ápí būudná caá. Pánihna, būudní pínahđih cáacwā ĩ jenah joyátjīh jeh ĩ wutuchah, Dios ā wutat pah nihcan, ĩ wutat dedé pínah nihcan caá. ²³Nin pahbut yeebđíh ĩ níj watna caá: “Weém oboh jumni caá”, ní níj jenah

* 2.12 Ro 6.4 * 2.13 Ef 2.1-5 * 2.14 Ef 2.15 * 2.16 Ro 14.1-6 * 2.19 Ef 1.22; 4.15-16
* 2.20 Ro 6.6-11; Gá 2.19-20; 4.3,9

joyoó”, i niijná caá. Íih bácahdih yeejép chājnit, yeebdíhbut bíic yoobó i chājat túutna yuh caá. Páant i wutuchah, jéih beedáni i jenah joyát pah i chājat túutna yuh caá. Obohjeéhtih, i wutat á táican caá. Páant cáacwājeh i wutat dée nihna, jwí yéej chājatdih jwí cádahíhichah yuhna, jwiítidh ā teo wáaccan caá.

3 ¹Cristo waoh boo pud jüöhni ā jumuchah, yeeb áihwābut ájeéh boo pud jüöhni panihnit jumna, ā weñat pínahdih ñi túi jenah joyoó. Caán jeáboó jwí íip jéihyepmant bóo bawámant chéudnit, nihatdih wutni caá.*

²⁻³Cristoíhwā jumna, ñi yéej chājatdih ñi cádahachah, Diosboó yeebdíh ā wapna caá, páantjeh ájeéh ñi túi jumat pínah niijná. Jeáboó jwí jwibínachah, Dios ā wühni pínahdih túi jenah joinít, nin baácndih bóo yeejépdih ñi bidca bojoó.* ⁴Pánihna, Cristo páantjeh jumat túutni, jeámant ā jwáub dei jüwáwchah, nihat caandíh i wēi naáwáchah, yeeb ájeéh jumnitdihbut i wēi naóhbiyna caá.*

Yeeb Cristoíhwā ded pah ñi jumat

⁵Cristoíhwā jumna, játih ñi yéej chājatjidih ñi cádahaá: Ñi weha mána nihcannitjñh ñi yéej chāj cádahaá. Nihat ñi yéej chājñat jenah joyátidihbut ñi cádahaá. Bíí déedih ñi en ñinaha bojoó. Bíí déedih búdí bidna, Diosboodíh ñi jenah joicán caá. ⁶Bitá pánih yéej chājna, caandíh i yap yohochah ennit, queétdih íjina, Dios búdí ā peéh chājbiyna caá.*

⁷Pánih yéej chājnit ñit jum jwuhji tagaá. ⁸Obohjeéhtih, bæ caán yéej chājatdih ñi cádahaá. Nin pah ñi chājatdihbut ñi cádahaá: Ñi íj jenah joyátidih, túbít íjnit, ñi táoh jühñatdih, bitadih yeejép ñi jenah joyátidih, bitadih yeejép dooná ñi naáwátidih, yeejép ñi wéheatdih, nihat páant ñi chājatdih ñi cádahaá.

⁹⁻¹⁰Pánihna, yeebboó Jesúíhwā jumna, yéej chājatdih cádahnit, túíniboodíh túut nuumnít ñit jumap be.* Dios yeebdíh páant át túut nuumát túutap taga, caandíh chah ñi túi jéihyat pínah, caán ā jumat pah ñi jumat pínahbut niijná.*

Pánihnit jumna, ñi míc yeeca bojoó.*

¹¹Cristo nihat áihwājeéh ā jumuchah, Dios jwiít nihatdih bíic yoobó ā enna caá. Pánihna, judíowā, judíowā nihcannitbut, bóodnit, bóodcannitbut, jwíih wéheatdih wéhenit, wéhecannitbut, bohénit, bohécannitbut, teo wühnit, maáta déebut jwí jumuchah, dedé pínah nihcan caá. Jwiít nihat mácah jwí jumuchah yuhna, Jesucristo nihat áihwājeéh bíic yoobó ā jumna caá. Caán oboh jumni nihcah, caandíhjih chah jenah joyát caá jwiít nihatdih náahap.

¹²Pánihna, Dioíhwā, ā ñíonit, ā oinit jumna, nin pah ñi chājaá: Bitadih ñi íjgah en teo wáaca. “Chah jéihni wā jumna caá”, ñi niíj jenah joicá bojoó. Bitadih jühican, ded pah i chājachah yuhna, íjican, túinijeh ñi chājaá. ¹³Ñijeéh jumnit ñi náahat pah i chājcah yuhna, íjicanjeh, páantjeh ñi jumah bojoó. Ñijeéh jumnit yeebdíh i túi chājcah enna, míc íjnit, waícanjeh ñi míc yoobánaá. Jwí Maáh ñi yéej chājatdih át yohop taga. Páant ā yohat pah yeebút ñi íjitatdih ñi míc ámoohoó.* ¹⁴Páant wā wutat chah yeebdíh nin pah wā wutna caá: Bitadih ñi míc oyoó. Pánih míc oina, nihat bíih wā wutatdihbut ñi jepahbiyna caá. Pánih míc oina, bíic weh pah ñi jumbiyna caá. ¹⁵Bíic bácah panihni jumna, míc jühicanjeh, bita Jesúíhwā bíicndih jwí túi jumat pínahdih Dios jwiítidih ā náah yacna caá. Páant ā náah yacat pah, yeeb bíicndih ñi túi jumúú. Pánihna, ded pah ñi chājat pínahdih jenah joinít, “Nin pah chājna, ébita Jesúíhwā bíicndih páantjeh wā túi jummi níit?” niíj jenah joyát caá náahap. Pánih túi bíicndih jumnit, “Ma teo wáacat túina caá, Paá”, Diosdih ñi niijí.

¹⁶Cristoíh túini doonádih ñi túi náhninaá. Búdí ā teo wáacatjñh ā naáwátidih ñi túi míc bohénaá. Pánihna, míc teo wáacat túut niijná, “iMa túi jenah joyó chaáh! Páant ma chājachah, meemjéh ma míc yeejabipna caá”, ñi niíj naáwá. Jwí Maáhdih chah jéihyat túut niijná, Salmosjñh, wēi ewatnajñh, Túini Espíritu ā wühni ewatnajñhbut bíicndih ñi

* 3.1 Sal 110.1; Mt 22.44; He 1.3 * 3.1-3 Ro 6.4-11; Col 2.12 * 3.4 Gá 2.20; Fil 1.21

* 3.6 Ef 2.3 * 3.9-10 Ef 4.22 * 3.9-10 Gn 1.26; Ef 2.10 * 3.9-10 Ef 4.24 * 3.12-13 Ef 4.2,32

eweé. Caandíh bádí wēinit, “Túina caá, Paá”, Diosdih ñi niíj wēi eweé. ¹⁷Jwí Maáh Jesúsdih ñi weñaat túut niijná, ded pah chájna, ded pah naóhna, túinijeh chájnit ñi jumú. Cristo á teo wáacatjih jwí íip Diosdih wébhñit, “Túina caá, Paá”, caandíh ñi niijí.*

Ded pah Jesúfhwá bícwá í jumát

¹⁸Yeéb áa jumnit yaádh, ñi weha mánadih ñi túi jepahaá. Páant tigaá chájat náahap jwí Maáh Cristofhwá yaádhdi. ¹⁹Yeéb áa jumnit neonáboó ñi weha mána yaádhdi ñi túi oyoó. Pánih oinit, jüihcanjeh, túi waóhñit, queétdih túinijeh ñi jumú.*

²⁰Yeéb í wehbut ñi mánadih yap yohcannit mífijeh ñi jumú. Páant ñi jumuchah ennit, jwí maáh yeebdíh á wēibipna caá. ²¹Yeéb í mánabut ñi wehdih páantjeh ñi jüihca bojoó. Pánih jüihñit, íjanit, queétdih bádí ñita jígaha tagaá. “Í enechah, weémoó wá túi chájcan nacaá”, ita niíj jenah joi tágaá.*

²²Yeéb teo wéhñit ñi maátadih ñi túi jepahaá. “Caán á enechahjeh, wá túi teobipna caá, weemdíh á wēi enat pínah niijná”, ñi niíj jenah joicá bojoó. Obohjeéhtih, jwí Maáh Jesúsdih weñahna, ñi maátadih yeeccanjeh, ñi túi jepahaá. ²³Yoobópdih yeéb Cristofhwá jumna, caandíh túi jepahñit ñi jumú. Nin baácdih moón ñi maátadih jepahna, Cristodihbut jepahñit ñi jumú. Ded pah ñi maáta í wutat pah yabhcanjeh, ñi túi tewé. ²⁴Páant ñi jepahat jüib Cristoboó yeebdíh á túi chájbipna caá. “Wá pehbóó ñi juyéchah, yeebdíh túinidih wá wéhbipna caá”, jwí Maáh á niijátji pah á wéhbipna caá. Caandíh yeéb ñi túi jéihna caá. Jwí Maáh Cristodih yeéb teo wéhñit ñi jumna caá. ²⁵Obohjeéhtih, det túi chájcanñitdih bíic jedhdah wícan, jwí Maáh á peéh chájbipna caá.*

4 ¹Yeéb maátaboó, ñi pebh moondíh ñi túi wáyaá. Yeebdíhbut Dios ñi Maáh ded pah ñi chájachah, ápi enna caá. Páant á enatdih túi náhnit, á náah

yacat pah yoobópdih ñi pebh moondíh ñi túi chájaa.*

Nihat queét Jesúfhwá ded pah í jumát

²Túí jenah joinít, yeó jáap jumát pah Diosdih ñi túi wébu. Pánih wébhñit, á jepahat pínahdih jéihñit, “Weemdíh mapí túi chájna caá, Paá”, caandíh ñi niijí.

³⁻⁴Jwiítdihbut ñi wébu. Cristoíh túini dooná, cáacwá í jéih jwuhca naáhdih bohéna, queétdih jwí túi jéihyaat pínah niijná, jwí ípdih bádí ñi wébu. Páant wá bohéat jüib bæu nemat muúboó wá jumna caá. Pánihna, det weemdíh enedih juníntdih Dios naáwátidih wá túi naáwát pínah niijná, ñi wébat pínahdih wá náahna caá. Páant naáwát tigaá Cristo weemdíh á wutap.*

⁵Jesúsdih jepahcannitjééh jumna, áih túini doonádih queétdih ñi naáwáchah, í joyát pínah niijná, yéj chájcanjeh, Dios á náahat pah ñi chájaa.* ⁶Bitadih míc wéhena, túinijeh ñi naáwá. Páant ñi naáwáchah, túi wēi joinít, jéihñna, yeebdíh í wébh joibipna caá. Páant í wébh joyóchah, queétdih ñi túi jéih jepahbipna caá.

Pablo á péé túyat túat

⁷Jwí úd panihni, jwí oini Tíquico, Cristoíh túini doonádih bohéna, jwií bíicdih teo cádahcanni á jumna caá. Nin wá daácnidih wé bejna, ñi pebhna juibñit, nihat wíh doonádih yeebdíh á naóhbipna caá.* ⁸Ded pah wá jumatdih yeebdíh naóhñit, ñi jígahatdih á yayáat pínah niijná, ñi pebhna caandíh wá wahna caá.* ⁹Tíquicodih pej jum bejni pínah wá oini, wá úd panihni Onésimodihbut wá wahna caá. Caán níih tútchidih bóo, Cristodih cádahcanni á jumna caá. Pánihna, queét chénat pah jwií niñjeh ded pah jwí yapatdih yeebdíh í naóhbipna caá.*

¹⁰Aristarco, nemat muúboó wájééh jumni, yeebdíh á túyat túatna caá. Bernabé baih Marcosbut á túyat túatna

* 3.16-17 Ef 5.19-20 * 3.18 Ef 5.22; 1P 3.1 * 3.19 Ef 5.25; 1P 3.7 * 3.20 Ef 6.1

* 3.21 Ef 6.4 * 3.22-25 Dt 10.17; Ef 6.5-9 * 4.1 Ef 6.9 * 4.2-4 Ef 6.18-20; Fil 4.6

* 4.5 Ef 5.16 * 4.7 Hch 20.4; 2Ti 4.12 * 4.7-8 Ef 6.21-22 * 4.9 Flm 10-12

caá. Áih doonádih játih wáat wahap jī. Pánihna, ñi pebhna ā jaibínachah, caandíh ñi túi wēi jwāáá.* ¹¹Jesús “Justo”, ī niijníbut yeebdíh ā túyat túutna caá. Nit bífc peihcannitjeh caá wā déewā yoobát pohba weém bífcidih Dios naáwátidih ī bohéna caá, Cristodih cáacwā ī jepahat pínah niijná. Queét weemdíh túi teo wáacnit ī jumna caá. ¹²Épafra, ñijeéh jumniiji, yeebdíh ā túyat túutna caá. Caán Cristodih teo wáhni mun tigaá. Pánih jumnit, Diosdih wábhna, yeebdíh búdí āpí wábhna caá, “Ded pah ā niijátji pah Dios weemdíh ā túi chájipna caá”, níj jéihna, Diosdih túi péenit, ā náahat pah ñi chájat pínah niijná.* ¹³Yeebdíh yoobópdih wā naóhna caá. Caán yeebdíh āpí wábh cádahcan caá. Laodicea tútchidih moondíh, Hierápolis tútchidih moondíhbut búdí āpí wábhna caá. ¹⁴Jwī oini Lucas, cohni cáacbut yeebdíh ā

túyat túutna caá. Demas yuh buca ā túyat túutna caá.*

¹⁵Jwī déewā Laodicea tútchidih moón búdí ī túya naáh. Ninfabut mi túya naáh. Jesúfhwā míh muúboó míc wáacnitbut ī túya naáh.

¹⁶Nin wā wahni núodih ñi míc bohé péenit, Laodicea tútchidih moondíhbut ñi wahaá, queébut ī míc bohéat pínah niijná. Queédih wā wahni núodihbut, yeebbút ñi míc bohénaá.* ¹⁷Arquipodih nin pah ñi níj naáwá: “Jwī Maáh Jesús meemdíh ā wutajji pah ma péanaá”, ñi niiji.*

¹⁸Weém Pablo, wíh téhyajihjeh nin túyat túutatdih wā daácna caá. Yeebdíh búdí wā túyat túutna caá. Nemat muúboó wā jumadih náhnit, weemdíh búdí ñi wábh. Dios yeebdíh oinit, búdí ā teo wáaca naáh.

Páant bóojeh tigaá wā naáwát.
Pablo

* 4.10 Hch 12.12,25; 13.13; 15.37-39; 19.29; 27.2; Flm 24 * 4.12 Col 1.7; Flm 23

* 4.14 2Ti 4.10,11; Flm 24 * 4.16 Ap 3.14-22 * 4.17 Flm 2